

BERDAD NUNCA
A PERJUDICA
NINGUN HENDE
NINGUN CAUSA
NI NINGUN
NACION

DIARIO

E MATUTINO DI ARUBA

Abonado pa luna Afl.19,00*Pa ehemplar 80 cent*aña 12/No.3493

DIABIERNA 28 FEBRUARI 1992

KONKELMENTO CU ELECCION DI REINA DI CARNAVAL

ORANJESTAD(AAN):Prins Barbie y Pancho Ken ayera a comete un error grandi ayera anochi di bay saca Reina di Distrito di Santa Cruz como Reina di Carnaval, siendo cu ta Monica Saladin di Aruba Tivoli Club nan mester a bay escoge como e reina eligi.

E cos aki a laga un sabor masha amargo atras pa eleccion di reina di carnaval di Aruba 1992, ya cu no ta conoci si ta intencionalmente nan a escoge "Reina Lyndell Nieuwkerk".

E actitud aki di Prins y Pancho, a parce un konkelmento ayera anochi y a laga tur hende ta sinti nan mes malo cu algo asina por pasa den eleccion di Reina di Carnaval.

Mes ora tambe e prins y pancho di carnaval a wordo descualifica como prins y pancho di carnaval 1992.

President di jurado, Sr. Henk Timmerman correctamente a bini dilanti y a mustra bon cla cu e firstrunnerup a ricibi 272 punto y e reina di carnaval **MONICA SALADIN** a ricibi 280 voto di juradonan y cu no ta e reina di Santa Cruz a ser eligi como reina.

Serca simpatisadornan di reina di distrito di Santa Cruz e anuncio di Sr. Timmerman a cay manera un bom durante nan celebracion cu a bira mes ora un tristeza grandi, mescos pa e candidata cu no tin arte ni parte den e asunto.

Masha vergonza masha hopi hende a sinti nan mes ayera anochi cu e desarrollo aki, principalmente dilanti e jurado di exterior y dilanti otro bishitantenan di exterior cu a presencia e eleccion ayera anochi.

Hopi a comenta ayera tambe cu e decision di Prins y Pancho no solamente lo tabata pa demostra nan malcontento intencionalmente, pero lo por ta tambe un revancha riba Tivoli, pasobra nan no a mag di balia dilanti den parada di carnaval Diadomingo ultimo hunto cu e grupo di Oranjestad cu reina infantil di Playa acompaña pa piézanan di e parada infantil di Aruba Tivoli Club.